

પિત્તરા લોખલાં પેલ્લા પત્ર પ્રેસ્તાવના

પ્રેષિત પિત્તરા પત્રાલ વાયનારા ગરબડ્યેમાય આતા એને ચ્યાહા બોરાહા લીદે ચ્યાહા આરે ઓઅય રિઅલો સતાવથી નિરાશ આતા. પિત્તરે ચ્યાહાલ મજબુત ઉબા રાંહાટી ઉસરાવ્યા, ગેડી-ગેડી ચ્યાહાલ ખ્રિસ્તા ઉદાહારણ યાદ દેવાડતા, ચ્યામાય ચ્યાહા હક્ક ઓદિકારા મિલકાત એને ચ્યા હોરગે લેય જાઅના પાછા ફિરી ચેઅના આશા દેખાડી પિત્તરે હોમજાડ્યા ફા જોવે ચ્યા પોતાના બોરાહા લીદે પીડાતાહા તોવે ખ્રિસ્તી લોકહાય કેહેકેન રા જોજે, પિત્તરાલ “આશાયે પ્રેષિત” આખલા ગીયા, પિત્તરા પેલ્લો સંદેશ પ્રભુવોય બોરહો રાખના આગનાકારી બોનીન જીવના ચાહે કોહડીબી પરિસ્થીતી રોય એને પોતાની આશાયેલ પોરમેહેરા તારણા છેલ્લી પ્રતીજ્ઞાવોય મજબુત બોનાડી રાખના હેય. દુઃખ ચેઅના ઉમ્મીદ કાયામ બોનહી, બાકી ઈ અસ્થાયી હેય એને જ્યા મજબુત રોતાહા ચ્યાહાહાટી મહાન બોરકાત દેહે, પાઉલ સંભવતઃ ઇસવી સન 60 ના દશકા વચ્ચે યા પત્રાલ લોખલાં આતાં.

સલામ

¹ આંય, પિત્તર, જો ઈસુ ખ્રિસ્તા પ્રેષિત હેતાંવ, આંય ઈ પત્ર પોરમેહેરા નિવાડલા ચ્યા લોકહાન લોખી રિયહો, જ્યેં કા પુન્તસ, ગલાતીયા, કાપાદોકિયા, આસિયા, એને બિથુનિયા વિસ્તારા આલાગ શેહેરાહામાય પરદેશાહા હારકે રોતેહે.

² પોરમેહેર આબહે બોજ પેલ્લેથીજ તુમહાન પોતાના લોક ઓઅરાહાટી એને પવિત્ર આત્મા કામથી તુમહાન પવિત્ર કોઅરાહાટી નિવડી લેદલા આતા. ચ્યાય એહેકેન યાહાટી કોઅયા કા તુમા ઈસુ ખ્રિસ્તા આગનાયે પાલન કોઅે, એને ચ્યા લોયેથી શુદ્ધ ઓઅે. તુમહાન બોજ સદા મોયા એને શાંતી મિળતી રોય.

ચોક હોરગા બોરકાત

³ આપે પ્રભુ ઈસુ ખ્રિસ્તા આબહા પોરમેહેરા ધન્યવાદ ઓઅે, જ્યાંય આમે પ્રતિ પોતાની મોઠી દયાથી આમહાન ચોક નોવા જીવન

દેનહા. કાહાકા ચ્યાય ઈસુ ખ્રિસ્તાલ મોઅલા માઅને પાછો જીવતો કોઅયો, એને ચ્યાય આમહાન બોજ પુરા બોરહાહાતે જીવાહાટી લાયકે બોનાડયાહા, એટલે ઈ કા આમા ચ્યે વસ્તુહુલ મેળવા પુરી આશા રાખજે, જીં ચ્યાય આમહાન દેયના વાયદો કોઅયોહો.

⁴ આમા ચ્યા મહાન બોરકાતેહેલ મેળવાહાટી વાટ જોવજેહે, જીં ચ્યાય આપહેહાટી તિયાર કોઇન હોરગામાય થોવલી હેય, જાં તી નાંય હોડે એને નાંય તી ખારાબ ઓઅ, એને નાંય તી મિટાય જાય.

⁵ તુમહે ઈસુવોય બોરહા લીદે, પોરમેહેર તુમહાન પોતાના સામથ્યા થી હારેરીતે હાંબાળ રાખી રિયહો, જાવ લોગુ તુમા પુરાં તારણ નાંય મેળવી લેય જીં ઈસુ ખ્રિસ્તા પાછા ચેઅના દિહી દેખાડાહાટી તિયાર હેય.

⁶ ચ્યાહાટી તુમહાય ચે બોદયે વાતહેહાટી આનંદિત ઓઅરા જોજે, ભલે આમી વોછા સમયાહાટી આલાગ-આલાગ જાત્યા દુઃખહા સામનો કોઅરા પોડી રિયહો.

⁷ યા દુઃખહા મોતલાબ ઈ દેખાડના હેય કા, કાય તુમા હાચ્યાંજ પોરમેહેરાવોય બોરહો કોઅતાહા કા નાંય. ઈસુ ખ્રિસ્તામાય તુમહે બોરહો હોના કોઅતો બોજ કિમતી હેય, જેહેકેન નાશમાન હોનાલ આગડાકોય પારાખલા જાહાય એને શુદ્ધ કોઅલા જાહાય, ચ્યેજ રીતે તુમહે બોરહો આગડા હારકા દુઃખહા થી પારખ્યા પાછે બી મજબુત રોહે, તે ઈ ચ્યે દિહી તુમહાન બોજ પ્રશંસા એને મહિમા એને માનપાન દેવાડી જોવે ઈસુ ખ્રિસ્ત પાછો યા દુનિયામાય ચેઅરી.

⁸ તુમહાય ઈસુલ કોદહી નાંય દેખ્યોહો, બાકી તેરુ ચ્યાલ તુમા પ્રેમ કોઅતાહા. તુમા ચ્યાલ આમીબી નાંય એઅ. બાકી તેરુંબી તુમા ચ્યાવોય બોરહો થોવતાહા. યાહાટી, તુમા આનંદ એને મહિમાથી બોજ ખુશ ઓઆ જ્યાલ શબ્દામાય વર્ણન નાંય કોઅલા જાય હોકે.

⁹ તુમા ખુશ હેતા, કાહાકા પોરમેહેર તુમહે આત્માહા તારણ પુરીરીતે કોઅય રિયહો, ઈ ખ્રિસ્તમાય આપહે બોરહા પ્રતિક્ષણ હેય.

ભવિષ્યવક્તાહા સાક્ષી

¹⁰ યા તારણા બારામાય ભવિષ્યવક્તાહાય બોજ સાવધાની થી હોદ એને તાપાસ કોઅયી, એને ચ્યાહાય ભવિષ્યવાણી કોઅલી આતી,

કા કેહેકેન પોરમેહેર તુમહે તારણાહાટી તુમહે પ્રતિ દયાળુ રીતેથી કામ કોઅરી, જ્યા તુમા યોગ્ય નાંચ હેય.

11 ઈસુ ખ્રિસ્તા આત્મા ભવિષ્યવક્તાહા માય આતો, જું ખ્રિસ્તા દુઃખ એને ચ્યા દુઃખહા પાછે મિળનારી મહિમા બારામાય ચ્યાહાન પેલ્લેથી આખી રિઅલો આતો. ભવિષ્યવક્તાહાય ઈ જાઅના કોશિશ કોઅચી કા આત્મા ચ્યાહાલ કાય દેખાડી રીઅલા આતાં, યો બોધો વાતો કોવે ઓઅરી એને યો કેહેકેન પુર્યો ઓઅરી.

12 બાકી પોરમેહેરાય ચા ભવિષ્યવક્તાહાન દેખાડ્યાં કા ચ્યાહા સંદેશ પોતાનાહાટી નાંચ બાકી તુમહેહાટી આતો. તો સંદેશ ઈસુ ખ્રિસ્તા હારી ખોબારે બારામાય હેય, જો તુમા આમી વોનાયાહા. પોરમેહેરાય હોરગામાઅને ચ્યા પવિત્ર આત્મા દોવાડયા કા તુમહાન હારી ખોબાર આખાહાટી લોકહા મોદાત કોઅે. ઈ બોદા ઓલા નોવાયે હેય કા ઓલે લોગુ કા હોરગા દૂત બી આનંદથી યે વાતહેલ ઓઅતા એઅય રીયહા.

પવિત્ર જીવન જીવાહાટી હાદના

13 ચાહાટી, હારેરીતે વિચાર કોઆ એને પોતાના મોનાલ કાબુમાય રાખા, એને હાયવીન રા એને ઈસુ ખ્રિસ્તા પાછા ચેઅના સમયે તુમહાન મિળનારા તારણાહાટી પુરી-પુરી આશા રાખા, જું પોરમેહેર તુમહાન પોતાના સદા મોયાથી દેઅરી, જોવે ઈસુ ખ્રિસ્ત હોરગામાઅને, પાછો ચા દુનિયામાય ચેઅરી.

14 આગના માનનારા પોહહા હારકા પોરમેહેરા આગનાયે પાલન કોઆ એને ચ્યા ખારાબ કામહાલ મા કોઅહા, જ્યાહાલ તુમા તોવે કોઅના ઇચ્છા રાખતા આતા, જોવે તુમા પોરમેહેરા હાચ્યાયેલ નાંચ જાઅતા આતા.

15 બાકી જેહેકેન તુમહાન હાદનારો પોરમેહેર પવિત્ર હેય, તેહેકેન તુમાબી બોદા સ્વભાવામાય પવિત્ર બોના,

16 કાહાકા પવિત્રશાસ્ત્રમાય પોરમેહેર આખહે તુમા, “પવિત્ર બોના, કાહાકા આંચ પવિત્ર હેય.”

17 જોવે તુમા, ઓ આબા આખીન ચ્યાલ પ્રાર્થના કોઅતાહા, તે યે વાતેલ યાદ રાખા, કા તો પક્ષપાત કોઅયા વોગાર, હર ચોક માઅહા

કામહા પરમાણે ન્યાય કોઅહે, યાહાટી જોવે તુમા દોરત્યેવોય પારદેશી બોનીન રોતહા, તે ચ્યા દાક રાખીન પોતાના જીવન જીવા.

18 તુમા જાંઅતાહા કા વિતી ગીઅલા સમાયમાય તુમા ચોક નોકામ્યા જીવન જીવતા આતા, ચોક ઓહડો તરીકો જો તુમહે વડીલાહાથી દેનલો આતો, બાકી તુમહાન ચ્યા નોકામ્યા જીવનથી છોડવી લેદલા ગીયા. તુમહાલ હોના કા ચાંદી જોહડી નાશ ઓઅય જાનારી વસ્તુહુથી નાંચ વેચાતાં લેદહા,

19 બાકી ખ્રિસ્તા કિમતી લોયાથી, જો ચોક શુદ્ધ એને નિર્દોષ ગેટા હારકો આતો.

20 યા દુનિયાલ ઉસબાડ્યા પેલ્લાજ પોરમેહેરાય નોકકી કોઅય લેદેલ કા ઈસુ ખ્રિસ્ત છોડાવનારો ઓઅરી. બાકી તો તુમહે ભલાઈ કોઅરાહાટી યા છેલ્લા દિહાહામાય યા દુનિયામાય ચેનો.

21 ઈસુ ખ્રિસ્તાય જીં કાય આપહેહાટી કોઅયા, ચ્યા લીદે તુમા આમી પોરમેહેરાવોય બોરહો કોઅતાહા, જ્યાંય ઈસુ ખ્રિસ્તાલ મોઅલા માઅને પાછો જીવતો કોઅયો એને ચ્યાલ બોજ વોદારે મહિમા દેની, યાહાટી તુમા બોરહો કોઅતાહા એને પોરમેહેરામાય તુમહે આશા આમી મજબુત હેય.

22 કાહાકા હાચ્યાયે પાલન કોઅનાથી તુમહાન તુમહે પાપહાથી શુદ્ધ કોઅય દેનહા, આમી તુમહાય પોતાના આર્યા વિસ્વાસ્યાહાવોય નિષ્કપટતાથી પ્રેમ કોઅરા જોજે. ચોક બિજાવોય આનંદથી બોઆયને એને પુરા મોના થી પ્રેમ કોઅના ચાલુ રાખા.

23 કાહાકા તુમહાન પોરમેહેરાપાઅને ચોક નોવા જીવન મિવ્યહા, તુમહાન ઈ જીવન કાદે ઓહડયે વસ્તુ થી નાંચ મિવ્યાં, જીં નાશ ઓઅય જાઅરી, બાકી કાય ઓહડયે થી મિવ્યાં જીં કાયમ રોઅરી, એટલે, પોરમેહેરા જીવતા એને અનંત વચન થી મિવ્યહા.

24 કાહાકા પવિત્રશાસ્ત્ર ઈ આખહે, “બોદા લોકહા જીવ ગાહીયા હારકા હેય એને ચ્યાહા બોદી સોબા ગાહીયા ફુલા હારકી હેય, ગાહીયા ઉખાય જાહાય, એને ફુલેં ટુટી પોડતેહે.

25 બાકી પોરમેહેરા વચન કાયામુંજ ટકી રોહોય.” ઈ વચન ઈસુ ખ્રિસ્તા બારામાય હારી ખોબાર હેય જું તુમહે વોચમાય પ્રચાર કોઅલો ગીઅલો આતો.

2

નિવાડલો દોગાડ એને ચ્યા નિવાડલા લોક

1 યાહાટી, હર જાત્યા ખારાબ વેવહારથી દુર રા, બીજહાન દોગો મા દાહા, કપટી, ડોંગી મા બોનહા, બીજહાન ઓદરાય નાંચ કોઅના, એને બીજહા વિરુદ ખારાબ વાતો નાંચ આખના.

2 જ્યે રીતે ચોક નોવો જન્મો લેદલા પોહા પોતાની આયહે દુદ પિયાં ઇચ્છા રાખહે, તેહેકેનુજ તુમાબી પોરમેહેરા વચન હિકના ઇચ્છા રાખા એટલે તુમા લોક આત્મિક રુપામાય મજબુત બોની હોકે. તોવે પોરમેહેર તુમહાન એને યા દુનિયાથી બોચાવી.

3 કાહાકા જેહેકેન પવિત્રશાસ્ત્ર આખહે, “તુમહાય અનુભવથી જાંઅયાહા કા પ્રભુ દયાળુ હેય.”

4 આમી તુમા પ્રભુ ઈસુપાય યેનહા, જો ચોક ઈમારતે પાયામાય થોવલો ચોક મહત્વા દોગાડા હારકો હેય, બાકી તો જીવતો દોગાડ હેય. કોલહાક લોકહાય ચ્યાલ નાકારી દેનલો આતો, બાકી પોરમેહેરે ચ્યાલ નિવડયો એને ચ્યાલ બોજ કિમતી ગોણહે.

5 એને જ્યે રીતે લોક દોગડાહા થી ગુઉ બોનાડતેહે, ચ્યે રીતે પોરમેહેર તુમહાન ચોકહાતે ચોકા ટોળામાય જોડી રિયહો જ્યામાય પોરમેહેરા આત્મા રોહે, એટલે જું ઈસુ ખ્રિસ્તાય આમેહાટી કોઅયા, ચ્યાથી તુમા ચ્યા યાજકાહા હારકા જ્યા બલિદાન ચોડાવતાહા, ઓહડે કામે કોઆ જ્યે પોરમેહેરાલ પ્રસન્ન કોઅતેહે.

6 ઈ તેહેકેનુજ હેય જેહેકેન પોરમેહેર પવિત્રશાસ્ત્રમાય આખહે, “એઆ, માયે ચોક મુખ્ય ખૂણા કિમતી દોગાડ નિવડયોહો, જો સીયોન શેહેરામાય ગોઆલ મજબુત બોનાવાહાટી ઉપયોગ કોઅલો જાહાય, એને જો કાદોબી ચ્યાવોચ બોરહો કોઅહે, તો શરમાયી નાંચ.”

7 ઓ દોગાડ તુમહેહાટી બોજ કિમતી હેય, જ્યે ઈસુ ખ્રિસ્તાવોચ બોરહો કોઅતેહે, બાકી જ્યા લોક ચ્યાવોચ બોરહો નાંચ કોઅેત ચ્યાહા

બારામાય પવિત્રશાસ્ત્ર આખડે કા, “જો દોગાડ કોડયાહાય ઉપયોગ કોઅના નકામ્યો ગણ્યો, તો ઈમારતે પાયામાય બોદહાથી કિમતી દોગાડ બોની ગીયહો.”

8 એને પાછી પવિત્રશાસ્ત્ર ઇબી આખડે, “તો ઓહડો દોગાડ હેય જ્યાથી લોકહાન ઠોકાર લાગહે, ઓહડા ખોલકડા હેય, જ્યાથી એ ઠોકાર ખાતહે,” કાહાકા એ વચનાવોય બોરહો કોઅરા નાંચ માગેત, યાહાટી એ ઠોકાર ખાયન પોડી જાતહે, પોરમેહેરે આહા હાતે ઈ ઓઅના યોજના બોનાડીહી.

9 બાકી તુમા પોરમેહેરા નિવાડલા લોક, એને આ યાજક હેતા, જો રાજા હેય, તુમા લોક પોરમેહેરાહાટી સમર્પિત એને આ ખાસ લોક હેતા. એ તુમહાન આંદારામાઅને પોતાના અદભુત ઉજવાડામાય હાધાહા, એટલે તુમા આ અદભુત કામહા ઘોષણા કોઅય હોકે.

10 પવિત્રશાસ્ત્રામાય હાચ્યાંજ લોખ્યાહાં, કા તુમા પેલ્લા પોરમેહેરા લોક નાંચ આતા, બાકી આમી પોરમેહેરા લોક હેતા. પેલ્લા તુમા પોરમેહેરા દયાલ નાંચ જાઅતા આતા બાકી આમી તુમા યાલ જાંઅતાહા કાહાકા આય પેલ્લેથીજ તુમહાવોય પોતાની દયા દેખાડીહી.

પોરમેહેરાહાટી જીવના

11 ઓ બાહા એને બોઅયેહેય, તુમા યા દુનિયામાય પરદેશી એને મુસાફીર હારકા હેતા, આંચ તુમા લોકહાન વિનાંતી કોઅતાહાંવ કા ચ્યો બોધો શરીરા ખારાબ ઇચ્છાહાથી બોચા કાહાકા યો તુમહે આત્માહા વિરુદ્ધ કોઅત્યોહો.

12 અવિસ્વાસી લોકહાવોચમાય તુમહે જીવન હારાં રા જોજે, કાહાકા જ્યાથી કા જ્યા બારામાય એ તુમહાન ખારાબ માનીન તુમહે નિંદા કોઅતેહે, એ તુમહે હારે કામે દેખીન ઈસુ પાછા ચેયના દિહામાય પોરમેહેરા મહિમા કોઅે.

ઓદિકાર્યાહા આધીન રોઅના

13 આમહાય એ બોદયે સત્તાયેહે આધીન રોઅના હેય, જ્યેહેન માઅહાથી નિવાડલ્યો જાત્યોહો, કાહાકા ઈ પ્રભુ ઇચ્છા હેય, રાજા આધીન રા, જો બોદહાવોય રાજ કોઅહે.

14 એને રાજ્યપાલા બી આધીન રા કાહાકા તોજ હેય જ્યા ઉપયોગ રાજા આ લોકહાન ડોડ દાંહાટી કોઅહે જ્યાહા કામે ખારાબ હેય એને આ લોકહા વાહવા કોઅરાહાટી જ્યાહા કામે હારે હેતે.

15 કાહાકા પોરમેહેરા ઇચ્છા ઓહડી હેય, તુમા હારાં કામ કોઆ એટલે તુમા આ મૂર્ખ લોકહાન તુમહે વિરુદ્ધ ગલત દોષ થોવના થી રોકી હોકે જ્યે પોરમેહેરાલ નાંય જાંએત.

16 તુમા લોક પોતે પોતાલ છુટકારો મિળલો જાંઅયા કાહાકા આમહે પ્રભુ ઈસુ ખ્રિસ્તાય પેલ્લેથીજ તુમહે છુટકો કોઅયહો, બાકી યા છુટકા પાહલા ખારાબ કામે મા કોઅહા, બાકી તુમા પોરમેહેરા સેવાકાહા હારકો વેવહાર કોઆ.

17 બોદહા આદર કોઆ, પોતાના બોદા વિસ્વાસ્યાહાવોય પ્રેમ કોઆ, પોરમેહેરા દાક રાખા, રાજા સન્માન કોઆ.

ઈસુ ખ્રિસ્તા દુઃખા દાખલો

18 ઓ ચાકારાહાય, હરેક જાત્યા દાક રાખીન પોતાના માલિકાહા આધીન રોયન આહા આગનાયેહે પાલન કોઆ, એહેકેન બોદ્યે જાત્યા માલિકાહા હાતે કોઆ પાછે આ દયાળુ એને હારાં ઓએ કા કડાક ઓએ.

19 કાહાકા પોરમેહેર બોદાંજ જાંઅહે એહે જાઇન અન્યાયા થી દુઃખ ઉઠાવતા કષ્ટ સહન કોઅતેહે, તે પોરમેહેર આમહે થી રાજી ઓઅહે.

20 કાહાકા જો તુમહાય બુલ કોઇન માર ખાદહો, તે ડોડ મિળના થી ધીરજ રાખનામાય તુમહે વાહવા કોઅના કાય કારણ નાંય હેય. બાકી જો હારાં કામ કોઇન દુઃખ ઉઠાવતાહા એને ધીરજ રાખતાહા, તે યાકોય પોરમેહેર રાજી ઓઅહે.

21 એને તુમહાન યાહાટીજ હાદ્યાહા બી કાહાકા ખ્રિસ્તે તુમહેહાટી દુઃખ ઉઠાવીન, તુમહાન ચોક નમુનો દેય ગીયહો કા તુમાબી આ પાગહા નિશાણ્યેહેવોય ચાલા.

22 પવિત્રશાસ્ત્ર આખહે, “નાંય તે આય પાપ કોઅયો, એને નાંય એ કોદહી જુઠા બોલ્યો, ચોક વોખાત બી નાંય.”

23 આય નિંદા કોઅનારાહા બી નિંદા નાંય કોઅયી, એને જોવે આલ દુઃખ દેના તે આય કાદાલ દોમકી નાંય દેની, બાકી એ પોતે પોતાલ

પોરમેહેરા આથામાય હોઅપી દેના જો કાયામ હાર્યાયેથી લોકહા ન્યાય કોઅહે.

24 તો પોતેજ આમહે પાપહાલ પોતાના શરીરાવોય લેયને હુળીખાંબાવોય ચોડી ગીયો, જ્યાથી આમા પાપહાહાટી મોઅયન ન્યાયપણાહાટી જીવન જીવજે, એને ચ્યા ઘાવહાથી આમા હારાં ઓઅય ગીયહા.

25 તુમા પેલ્લે ટાકાલા ગેટહા હારકે આતે, બાકી આમી તુમા ખ્રિસ્તાપાય ફિરી યેનહા જો તુમહે આત્માહા અધ્યક્ષ એને રાખવાવ્યો હેય.

3

થેઅયો

1 ઓ થેઅયેહેય, તુમા પોત-પોતાના માટડાહા આધીનમાય રોજા, એટલે જો યાહામાઅને ફાદો ઓહડો રોય જો પોરમેહેરા વચનાવોય બોરહો નાંય કોઅતો ઓરી,

2 તે જ્યે રીતે તુમા જીવન જીવત્યોહો, ચ્યા તુમહે કાય આખ્યાં વોગાર ચ્યા બોરહો કોઅે, એને જોવે ચ્યા તુમહે શુદ્ધ એને ઈશ્વરીય વેવહારાલ દેખી તોવે ચ્યા ખ્રિસ્તાવોય બોરહો કોઅરી.

3 એને તુમહે શણગાર બનાવત્યો નાંય રોય, જેહેકેન નકલી કીહારી, એને હોના ગારાણે પોવના, કા પાછે જાત્યે-જાત્યે ફાડકે પોવના.

4 બાકી તુમહે દિલમાય હેય, તીંજ હેય જું તુમહાન સુંદર બોનાડેહે, ઓ ચોક નમ્ર એને અવિનાશી ગુણહા કોય સોજાવલો રોય, જો કા પોરમેહેરાહાટી બોજ કિમતી હેય.

5 પેલ્લા સમયામાય રોનાર્યો પવિત્ર થેઅયોબી, જ્યો પોરમેહેરાવોય આશા પોતે-પોતાલ યે રીતેથી શણગારત્યો એને પોત-પોતાના માટડાહા આધીન રોત્યો આત્યો.

6 જેહેકેન સારા આબ્રાહામા આગના માનતી આતી એને ચ્યાલ સ્વામી આખતી આતી. જોવે તુમાબી હારાં કોઅત્યો રાહા એને કોઅહાજ પ્રકારા ઘાકથી ઘાકાય નાંય જાહા, તોવે તુમા ચ્યા પોહયેહે હારક્યો ઓઅહા.

માટડા

7 તેહેકેનુજ ઓ માટડાહાંય, તુમાબી પોતાના થેઅયેઆરે હોમાજદારીથી રોજા, એને એહે દિયાન રાખા, કાહાકા ચ્યો તુમહેથી નોબળ્યો હેત્યો, યાહાટી તુમા એહે આદર કોઆ. ઈ હોમજીન કા આમા બેની જીવના વરદાના વારીસ હેજે, જ્યેથી તુમહે પ્રાર્થનાયે માય રુકાવાટ નાંય ચેય.

બોરકાતે વારીસ બોનાહાટી હાદના

8 સેલ્લે, આંય તુમા બોદહાન ઈ આખા માગહુ, કા એકતામાય રા, ચોકબીજા કાળજી કોઆ, ચોકબીજાઆરે બાહા-બોઅહી હારકો પ્રેમ કોઆ, ચોકબીજાહાટી માયાળુ બોના, એને ચોકબીજાઆરે નમ્ર બોના.

9 ખારાબા બોદલે ખારાબ મા કોઅહા નાંય નિંદા બોદલે નિંદા કોઅના, બાકી યા ઉલટાં બોરકાતુજ દા કાહાકા પોરમેહેરે તુમહાન યાહાટીજ હાદ્યાહા, જો તુમા એહેકેન કોઅતાહા તે પોરમેહેરે તુમહાનબી બોરકાત દેઅરી.

10 કાહાકા પવિત્રશાસ્ત્ર આખહે, “જો કાદાં માઅહું પોતાના જીવના આનંદ લા માગહે, એને હારા દિહી એરા માગહે, તે તો ખારાબ વાતો નાંય આખે, એને જુઠા નાંય બોલે.

11 તો ખારાબ કોઅના છોડે, એને હારાંજ કોઅે, તો બીજહા આરે મેળ મિળાપ થી રાંહાટી કોશિશ કોઅે.

12 કાહાકા પ્રભુ નોજાર ન્યાયી માઅહાવોય લાગલી રોહે, એને ચ્યા કાન ચ્યાહા પ્રાર્થનાયે એછે લાગલા રોતહા, બાકી પ્રભુ ખારાબ કોઅનારાહા થી મુંચ ફેરવી લેહે.”

હારાં કોઅના લીદે સતાવણી

13 જો તુમા કાયામ હારાં કામ કોઅના કોશિશ કોઅતાહા, તે કાદોબી આસલીમાય તુમહાન નુકસાન નાંય પોઅચાડી હોકે.

14 જો તુમા ન્યાયપણા લીદે દુઃખબી ઉઠાવતાહા, તે આસલીમાય તુમા ધન્ય હેતા, તેહેકેન કોઆ જેહેકેન પવિત્રશાસ્ત્રમાય લોખલાં આતાં, “ચ્યા લોકહાથી મા બીયહા, જ્યા તુમહાન બીયાડતાહા એને ચે વાતે ચિંતા નાંય કોઅતા કા લોક કાય કોઅય હોકતાહા.”

15 બાકી ખ્રિસ્તાલ પોતાના રુદ્યામાય પ્રભુ હોમજીન ચ્યા માન કોઆ, એને જો કાદો તુમહાન તુમહે આશાયે બારામાય કાય પુછે, તે ચ્યાલ જાવાબ દાંહાટી કાયમ તિયાર રોજા, બાકી નમ્રતા એને આદર હાતે.

16 એને અંતકરણ બી શુદ્ધ રાખા, યાહાટી કા જ્યે વાતહેબારામાય તુમહે બદનામી ઓઅહે ચ્યાહા બારામાય ચ્યે, જ્યે ખ્રિસ્તામાય તુમહે હાર્યે ચાલચલને અપમાન કોઅતેહે, શરમાય જાય.

17 કાહાકા જો પોરમેહેરા ઈ ઇચ્છયા હેય, તે ખારાબ કોઅના લીદે ડોડ બોગાવના કોઅતા હારાં કોઅના લીદે દુઃખ સહન કોઅના વોદારે હારાં હેય.

ખ્રિસ્તા દુઃખ

18 આંય ઈ યાહાટી આખતાહાવ, કાહાકા ઈસુ ખ્રિસ્તાયબી યોકુજ વોખાત આમહે પાપાહા લીદે દુઃખ વેઠયાં એને તો ચોક ન્યાયી આતો તેબી આમે અન્યાયાહાહાટી મોઓઈ ગીયો, એટલે આમહાન પોરમેહેરાપાય લી યેય હોકે, તો શરીરા રુપામાય તે મોઓઈ ગીયો બાકી પવિત્ર આત્મા સામર્થ્યા થી પાછો જીવતો કોઅય દેનલો ગીયો.

19 તોવે ચ્યા આત્માય જાયને ચ્યા આત્માહાલ હારી ખોબારૂ પ્રચારૂ કોઅયો, જ્યે ચ્યા જાગાવોય પોરમેહેરાથી બંદ કોઅલે ગીયહે, જ્યે જાગે મોઅલા લોકહા આત્મે હેતે.

20 યે ચ્યા લોકહા આત્મે આતે, જ્યાહાય ચ્યા વિતી ગીઅલા સમયામાય આગના નાંય માનલી આતી, જોવે નોહો પોતાના ઉડ્યા બોનાવી રિઅલો આતો, તે પોરમેહેર ધીરજથી વાટ જોવી રિઅલો આતો કા કાય ચ્યા લોક પાપ કોઅના બંદ કોઅરી, બાકી કેવળ આઠ લોકહાન ચ્યા ભયાનક પાઅયામાય બુડનાથી બોચાડલા ગીયા.

21 ઈ બાપતિસ્મા નિશાણી હેય, જો આમી તુમહે તારણ કોઅહે, બાપતિસ્મા મોતલાબ શરીરા મળ દોવના નાંય, બાકી શુદ્ધ રુદ્યાથી પોતાનાલ પોરમેહેરાહાટી સમર્પિત કોઅના હેય. ઈ બાપતિસ્મા ઈસુ ખ્રિસ્તા મોઅલા માઅને પાછા જીવતા ઓઅનાથી આમહે તારણ કોઅહે.

22 આમી તો હોરગામાય જાયને પોરમેહેરા જમણી એછે બોઠલો હેય, એને તો બોદા હોરગા દૂતહા, ઓદિકાર્યાહા એને બોદયે શક્તિહેવોય રાજ કોઅહે.

4

બોદલાયલાં જીવન

1 યાહાટી, જોવેકા ખિસ્તે આ શરીરામાય રોતી વોખાત દુઃખ વેઠયાં, યાહાટી તુમહાય બી તોહોડોજ વિચારા હાતે દુઃખ વેઠાં હાટી તિયાર રા જોજે જીં આમાય આતાં. કાહાકા જો તુમા ખિસ્તાહાટી દુઃખ વેઠાં હાટી તિયાર હેતા, તે તુમહાય પાપ નાંય કોઅના ફેસલો કોઅય લેદહો.

2 એટલે ભવિષ્યામાય આપહે બાકી રીઅલા શારીરિક જીવન માઅહા ઇચ્છા પરમાણે નાંય બાકી પોરમેહેરા ઇચ્છા પરમાણે જીવતા રા.

3 કાહાકા તુમા લોકહાય અવિસ્વાસી ઇચ્છા પરમાણે કામ કોઅરા, એને વ્યબિયારા ખારાબ ઇચ્છાયો, વિષયવાસના, ભોગ વિલાસ, પિદાડ, એને ધિક્કારપાત્ર મુર્તિપુજા માય જો સમય વિતાવ્યો, તો બો જાયો.

4 યા લીદે તુમહે આગલ્યા હાંગાત્યા નોવાય પામી જાતહા જોવે તુમા આહાઆરે એ ખારાબ વસ્તુહુ માય ભાગીદાર નાંય ઓએ જયો આ કોઅતાહા, યાહાટી આ તુમહે બદનામી કોઅતાહા.

5 બાકી એ જો જીવતા એને મોઅલાહા ન્યાય કોઅનારા પોરમેહેરાલ પોતાના ચાલચલના ઇસાબ દેઅરી.

6 ઈ કારણ હેય કા મોઅલાહાન બી હારી ખોબાર વોનાડલી ગીયી, જ્યેથી જોવે આ શરીરામાય માઅહા હારકો મોઅઇ ગીયો, તેરુંબી આત્મામાય આ પોરમેહેરા હારકા જીવતા રિયા.

પોરમેહેરા મહિમાહાટી સેવા

7 બોદયે વાતહે છેવાટ તારાત ઓઅનારો હેય, યાહાટી સંયમ ઓઇન પ્રાર્થનાયેહાટી જાગતા રા.

8 બોદહાથી મહત્વા વાત ઈ હેય કા ચોક બિજાવોય વોદારે પ્રેમ કોઆ, કાહાકા જો તુમા લોકહાવોય પ્રેમ કોઅહા તે તુમા કાયામ કોઅહાબી ગલત કામાલ માફી દાંહાટી તિયાર રાહા જયો આહાય કોઅયોહો.

9 લોકહાન પોતાના ગોઅહામાય સ્વાગત કોઆ એને એહેકેન ટુટરીયા વોગાર ચોકબીજા ગાવાર ચાકરી કોઆ.

10 જ્યાલ જીં વરદાન પોરમેહેરા પાયને મિળલા હેય, તો આ વરદાનાલ પોરમેહેરા હારા ચાકારા રુપામાય બીજહા મોદાત કોઅરાહાટી ઉપયોગ કોએ.

11 જો કાદાપાય પ્રચાર કોઅના વરદાન હેય, તે તો પોરમેહેરા સંદેશા પ્રચાર કોએ, જો કાદાપાય બિજા લોકહાન મોદાત કોઅના વરદાન હેય, તે તો આ સામર્થ્યા થી કોએ જીં પોરમેહેર દેહે, તે જીં કાયબી તુમા કોઅહા તી ઈસુ ખ્રિસ્તા કોઇન પોરમેહેરાલ મહિમા દેવાડી. બોદી મહિમા સામર્થ કાયમ-કાયમહાટી આ હેય. આમેન.

પોરમેહેરા મહિમાહાટી દુઃખ ઉઠાવના

12 ઓ પ્રિય બાહા એને બોઅયેહેય, એ દુઃખ દેનાર્યે વસ્તુહુ બારામાય નોવાય મા પામહા જ્યા લીદે તુમા દુઃખ ઉઠાવી રીયહા, કાહાકા તુમા ખ્રિસ્તા હેતા. બાકી યો વસ્તુ ઈ દેખાહાહાટી ઓઅય રિયહો કા કાય તુમા હાચ્યાંજ પોરમેહેરાવોય બોરહો કોઅતાહા, યાહાટી, ઈ નાંય વિચારના કા તુમહેઆરે કાય નોવાય ઓઅય રીયહા.

13 બાકી યા બારામાય ખુશ રા, કાહાકા તુમહાન આ દુઃખાહામાય ચોક ભાગ મિળ્યહો જ્યે ખ્રિસ્તાલ મિળલે આતે. યા લીદે, જોવે ખ્રિસ્ત બોદા લોકહાન પોતાની મહિમા પ્રગટ કોઅરાહાટી પાછો ચેઅરી તે તુમહે આનંદ હાચ્યોજ મોઠો રોઅરી.

14 પાછે જો ખ્રિસ્તા નાંવા લેદે તુમહે નિંદા કોઅલી જાહાય, તે ધન્ય હેતા, કાહાકા પોરમેહેરા મહિમામય આત્મા, તુમહેમાય રોહે.

15 તુમહેમાઅનો ચોકતો વ્યક્તી ખૂની કા બાંડ, લુચ્યો ઓઅનાથી, કા બીજહા કામહામાય ઘાલમેલ કોઅના લીદે દુઃખ નાંય બોગવાં પોડે.

16 બાકી જો ખ્રિસ્તી ઓઅના લીદે દુઃખ બોગવે, તે આથી શરમાયા નાંય પોડે, બાકી, પોરમેહેરા મહિમા કોઆ કા તુમા યાહાટી દુઃખ વેઠી રીયહા કાહાકા તુમા ખ્રિસ્તા હેતા.

17 કાહાકા ન્યાય કોઅના સમય ચેય ગીયહો, કા પેલ્લો પોરમેહેરા લોકહા ન્યાય કોઅલો જાય, એને જોવેકા તો પેલ્લો આમા વિસ્વાસ્યાહા ન્યાય કોઅરી, યાહાટી એ ભયાનક વસ્તુહુ બારામાય વિચારા જીં આ

લોકહાઆરે ઓઅરી જ્યા એ હારી ખોબારેલ નાંચ માનેત જીં ય્યા પાયને થેહે.

18 જેહેકેન કા પવિત્રશાસ્ત્ર આખહે, “જો ચોકા હારા માઅહા તારણ ઓઅના ઓલા કઠીણ હેય, તે ખારાબ માઅહા એને પાપી નોકકીજ બોયનારા નાંચ.”

19 યાહાટી જ્યા પોરમેહેરા ઇચ્છા પરમાણે દુઃખ વેઠતાહા, ય્યાહાય પોરમેહેરાવોય બોરહો રાખના ચાલુ રાખા જોજે, જ્યે ય્યાહા રચના કોઅયીહી. પોરમેહેર કાયમ તી કોઅહે જ્યાલ કોઅના ય્યાય વાયદો કોઅલો આતો એને યાહાટી જીં હારાં હેય તી કોઅના ચાલુ રાખા.

5

ટોળા ગોવાળ

1 કોલ્યોહોક ઓહડયો વાતો હેય જ્યો આંચ તાઅને વડીલાહાન આખા કોઅતાહાંવ, કાહાકા આંચબી તુમહે હારકો ચોક આગેવાન હેતાંવ. માયે પોતે ય્યા દુઃખહાલ દેખ્યાહા, જીં બોજ પેલ્લા ખિસ્તાય વેઠયાં. જોવે તો પાછો ફિરી યેઅરી, તોવે આંચબી ય્યા મહિમામાય ભાગીદાર ઓઅહીં.

2 આમી આંચ તુમહાન વિનાંતી કોઅતાહાંવ, કા વિસ્વાસ્યાહા ય્યા ટોળા દેખભાલ કોઆ જીં પોરમેહેરા હેય, એને જ્યે તુમહાન દેખભાલા હાટી હોઅપી દેનલે ગીયહે. ઈ મજબુરીથી નાંચ, બાકી પોરમેહેરા ઇચ્છા પરમાણે આનંદથી કોઆ. તુમા ઈ કામ પોયહા આશાયેથી મા કોઅહા બાકી પોરમેહેર એને લોકહા સેવા કોઅના ઇચ્છાથી કોઆ.

3 જ્યા લોક તુમહાન હોઅપલા ગીયહા, ય્યા લોકહાવોય ચોક ઓદિકાર્યા હારકો મા બોનહે, બાકી ય્યાહાહાટી ચોક હારો નમુનો બોન.

4 કાહાકા જોવે ઈસુ ખિસ્ત, જો કા આમહે મુખ્ય ગોવાળ હેય, પાછો ફિરી યેઅરી, તોવે તુમહાન ચોક કોદહીજ કરમાય નાંચ જાય ઓહડો મહિમાયે મુગુટ દેઅરી.

પોરમેહેરાલ હોઅપાય જાયના એને સૈતાના વિરુદ્ધ કોઅના

5 યેજપરમાણે તુમા જુવાન માટડાહાંચ, તુમાબી વડીલ માટડાહા આધીન રા, તુમા બોદા ને બોદા નમ્રતા થી ચોકબીજા સેવા કોઆ,

કાહાકા કાદો પવિત્રશાસ્ત્રમાય વાચી હોકહે, “પોરમેહેર અભિમાની લોકહા વિરુદ્ધ કોઅહે બાકી તો ચ્યા લોકહાહાટી સદા મોયા કોઅહે જ્યા વિનમ્ર હેય.”

⁶ યાહાટી, પોતે પોતાલ પોરમેહેરા હામ્મે નમ્ર કોઆ જો રાખવાળી કોઅનામાય બળવાન હેય એટલે તો હાચ્યે સમાયે તુમહાન બોજ રીતે માનપાન દેય.

⁷ પોરમેહેરાલ આપહે બોધો પરેશાન્યો એને ચિંતાયો આખા કાહાકા તો તુમહે કાળજી કોઅહે.

⁸ સાવચેત ઓઆ, એને જાગતા રા, કાહાકા તુમહે દુશ્માન સૈતાન તુમહે તાપાસ કોઅતો ફિરતો રોહે એટલે તુમહે નાશ કોઅય દેય, રેકનારા સિંહી વાગા હારકો હેય, તો યા હોદમાય રોહે, કા કાલ ફાડી ખાઉં.

⁹ મજબુત બોરહાહાતે ચ્યા સામનો કોઆ, કાહાકા તુમા જાંઅતેહે કા યા દુનિયામાય તુમહે આર્યા વિસ્વાસી યે પરમાણે દુઃખ બોગવી રીયહા.

¹⁰ પોરમેહેર જો પુરીરીતેથી સદા મોયાકોય બોઆલો હેય, ચ્યાય તુમહાન ઈસુ ખ્રિસ્તાઆરે તુમહે એકતા લીદે ચ્યા અનંત મહિમાયેમાય ભાગીદાર બોનાહાટી તુમહાન હાધાહા. તુમહે વાયજ વાઆ લોગુ દુઃખ વેઠ્યાં પાછે પોતેજ તુમહાન સિદ્ધ એને મજબુત એને બળવાન કોઅરી.

¹¹ તો કાયમહાટી સામર્થશાલી થી રાજ કોઅરી. આમેન.

છેલ્લી સલામ

¹² માયે ઈ વાયહાના પત્ર સિલવાનુસા મોદાતકોય લોખ્યાં એને તુમહાન દોવાડયાહા. આંય ચ્યાલ ખ્રિસ્તામાય બોરહાવાળો બાહા રુપામાય માનતાહુ. મા ચાલ લોખના મોતલાબ તુમહાન ઈમાત દેઅના એને ખાત્રી કોઆડના હેય કા જો કાયબી તુમા અનુભવ કોઅય રીયહા, તો આસલીમાય તુમહેહાટી પોરમેહેરા સદા મોયા ભાગ હેય, યે મોયામાય ટિકિ રા.

¹³ બાબેલ શેહેરા વિસ્વાસી તુમહાન સલામ આપતેહે, જ્યાહાન પોરમેહેરે નિવડયાહા જેહેકેન ચ્યે તુમહાન નિવાડલા. માર્ક, જો માયેહાટી ચોક પોહા હારકો હેય, તોબી તુમહાન સલામ આપહે.

¹⁴ ચોકબિજાલ આસલીમાય પ્રેમથી સલામ કોઆ, તુમા બોદહાન, જ્યા ખ્રિસ્તામાય હેતા, શાંતી મિળતી રોય.

गामीत नोवो इरात
Bible in Gamit language of India

copyright © 2022 Beyond Translation

Language: (Gamit)

Contributor: Wycliffe USA

Read and download Bible and several other Christian materials in various formats : www.freebiblesindia.in

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-02

PDF generated using Haiola and XeLaTeX on 2 May 2025 from source files dated 2 May 2025

4883a606-3c54-5975-b41a-ca7f8faf825d